

En sauwere Kerl

EINLEITUNG

Guckt emol, des Bild, do steht er,
unsern typische Sandleener.

Egal ob hinne oder vorn,
en Mann aus echtem Schrot und Korn.

Mir wolle uns jetzt mol verweile
bei dem Kerl sei Körperteile.

Un dass i jo nix iwwerhopf,
fang i owwe o em Kopf.

HAARE

Sen d'Hoor verwerwelt, isch's en Werwel,
verzwirbelt, logisch, isch's en Zwerwel.

Simbelsfranse sen die Hoor,
wu vor de Stern so falle vor.

Krauses Haar, des nennt mer Krussel,
mit Kowwel hosch bei Weiwer Dussel.

KOPF

Rieb oder Moschkopf, haßt de Deez,
je nach Form - des isch kon Feez.

Wenn der Deez dann kugelrund,
isch Werrsching, Molles der Befund.

NASE

Die Nasform isch, lang, spitz, un stumpf,
je nochdem Rissel, Zinke, Kumpf.

MUND

Der Mund, des isch bei uns des Maul.
„Ned maulfaul“ nennt mer's **Plappermaul**.

Ned maulfaul, hot e Riese Gosch
wenn frech wersch, glei e Ohrfeig hosch.

Des Maul hoßt a noch Leffz un Lapp
un halte dud er nie - die Klapp

Un wenn traurich isch der Herr,
mecht er als emol e Schlärr.

Schun komisch, dass allegebott
er en de Gosch e Grindmaul hot.

Hot er em Maul e Spatzeck,
dann geht ello des widder weg.

KINN

Des Kinn, des werd ganz ungeniert
bei uns als Bart gern tituliert.

Zwe Bärt zu hawwe, isch ned schee,
doch sowas git's halt en Sandelee.

STUPFEL

Rasiert sich ned gern – nur zur Not,
un unrasiert, er Stupfel hot.

Wenn die Stupfel auf dem **Schopf**
ganz logisch - isch's en Stupfelkopf

En Mecki secht mer a dezu,
die Zeitschrift gitt's noch, die „Hör zu“.

AUGEN

Die Mädels gut em Blick, des hotter.
Die Are werre dann zu Glotzer.

Un manchmol - wenn i mi ned err,
do guckt er seltsam - wie e Werr.

Un s'isch **unglaublich**, isch kein Spott,
dass er em **Ag** als en Wegschisser hot.

En Rauhbauz isch's – en Dunnermasser!
Doch manchmol kriegt er Arewasser.

Grad ufgschdanne, **grad** dass er zwatzelt,
sen sei Are noch vermatzelt.

OHREN

Un aus em Ohr, des sieht ned schee aus,
guckt als de Ohrematzel raus.

Houchdeitsch host des Ohrenschmalz,
doch jetzt gehne mer zum Hals.

HALS

Die Ankel hinne, unnerm Kopf,
vorne isch de Gurgelksknopf.

Wer schmeichle will, verzehlt en Schmutz,
un wer en Zorn hot, geht an d' Grutz.

HÄNDE

Die Hände sind, des sen kei Bosse,
Bratze, Knoche, Griffel, Flosse.

BAUCH

En Wampes hot er, nimmi schee,
kummt vum Bett fascht ned en'd Heh,

sieht komisch aus mit der Muntur,
kei Wunner isch's bei der Figur.

Mit dem Wampes vorne naus,
ja des isch vielleicht en Graus,

weil mit so me dicke Ranze
kann er nimmi gloichlich danze.

Bei Probleme hot er Huddel,
doch **des** mecht **nix** – der **hot** e Kuttel.

FÜSSE

Die Fieß die gehne, s' nemmt mi Wunner,
vum Owerschenkel ab ganz nunner.

CHARAKTER

Ja isch des ned en scheene Borscht,
hot manchmol schun en grouße Dorscht.

En Mann von echtem Korn und Schrot
isch vun Sand Lee - - - vielleicht vun Rot??

Ob breit, ob schmal isch sei Gestell,
immer luschdich, der Gesell.

Wenn der reikummt, do werd's hell -
in jedem Fall – en sauwere Kerl!